

## ॥ श्रीहनुमानचलीसा ॥

॥ दोहा ॥

श्रीगुरु चरन सरोज रज निज मनु मुकुरु सुधारि । बरनऊं रघुवर बिमल जसु जो दायकु फल चारि ॥  
बुद्धिहीन तनु जानिके, सुमिरौं पवनकुमार । बल बुधि विद्या देहू मोहिं, हरहु कलेस बिकार ॥

॥ चौपाई ॥

जय हनुमान ज्ञान गुनसागर । जय कपीस तिहुं लोक उजागर ॥१॥  
रामदुत अतुलितबलधामा । अंजनीपुत्र पवनसुत नामा ॥२॥  
महाबीर बिक्रम बजरंगी । कुमति निवार सुमति के संगी ॥३॥  
कंचन बरन बिराज सुबेसा । कानन कुंडल कुंचित केसा ॥४॥  
हाथ बज्र औ ध्वजा बिराजै । कांधे मूंज जनेऊ साजै ॥५॥  
संकर सुवन केसरीनंदन । तेज प्रताप महा जग बंदन ॥६॥  
बिद्यावान गुनी अति चातुर । राम काज करिबे को आतुर ॥७॥  
प्रभु चरित सुनिबे को रसिया । राम लखन सीता मन बसिया ॥८॥  
सूक्ष्म रूप धरि सियहिं दिखावा । बिकट रूप धरि लंक जरावा ॥९॥  
भीम रूप धरि असुर संहारे । रामचंद्र के काज सँवारे ॥१०॥  
लाय सजीवन लखन जिजाये । श्री रघुबीर हरषि उर लाये ॥११॥  
रघुपति कीन्ही बहुत बडाई । तुम मम प्रिय भरतहि सम भाई ॥१२॥  
सहस्र बदन तुम्हरो जस गावै । अस कहि श्रीपति कण्ठ लगावै ॥१३॥  
सनकादिक ब्रह्मादि मुनीसा । नारद सारद सहित अहीसा ॥१४॥  
जम कुबेर दिगपाल जहाँ ते । कबि कोबिद कहि स के कहाँ ते ॥१५॥  
तुम उपकार सुग्रीवहिं कीन्हा । राम मिलाय राज पद दीन्हा ॥१६॥  
तुम्हरो मंत्र बिभिषन माना । लंकेस्वर भए सब जग जाना ॥१७॥  
जुग सहस्र जोजन पर भानू । लील्यो ताहि मधुर फल जानू ॥१८॥  
प्रभु मुद्रिका मेलि मुख माहीं । जलधि लाँधि गए अचराज नाहीं ॥१९॥  
दुर्गम काज जगत के जेते । सुगम अनुग्रह तुम्हरे तेते ॥२०॥  
राम दुआरे तुम रखवारे । होत न आज्ञा बिनु पैसारे ॥२१॥  
सब सुख लहै तुम्हारी सरना । तुम रच्छक काहू को डार ना ॥२२॥  
आपन तेज सम्हारो आपै । तीनों लोक हाँक तैं कापैं ॥२३॥  
भूत पिसाच निकट नहिं आवैं । महाबीर जब नाम सुनावैं ॥२४॥  
नासै रोग हरै सब पीरा । जपत निरंतर हनुमत बीरा ॥२५॥  
संकट तैं हनुमान छुडावैं । मन क्रम बचन ध्यान जो लावैं ॥२६॥  
सब पर राम तपस्वी राजा । तिन के काज सकल तुम साजा ॥२७॥  
और मनोरथ जो कोइ लावैं । सोइ अमित जीवन फल पावैं ॥२८॥  
चारों जुग परताप तुम्हारा । है परसिद्ध जगत उजियारा ॥२९॥  
साधु संत के तुम रखवारे । असुर निकंदन राम दुलारे ॥३०॥  
अष्ट सिद्धि नौ निधि के दाता । अस बर दीन जानकी माता ॥३१॥  
राम रसायन तुम्हरे पासा । सदा रहो रघुपति के दासा ॥३२॥  
तुम्हरे भजन राम को पावैं । जनम जनम के दुख बिसरावैं ॥३३॥

अन्तकाल रघुबर पुर जाई । जहाँ जन्म हरि-भक्त कहाई ॥३४॥  
और देवता चित्त न धरई । हनुमत सेइ सब सुख करई ॥३५॥  
संकट कटै मिटे सब पीरा । जो सुमिरै हनुमत बलबीरा ॥३६॥  
जै जै जै हनुमान गोसाई । कृपा करहु गुरु देव की नाई ॥३७॥  
जो सत बार पाठ कर कोई । छूटहि बंदि महा सुख होई ॥३८॥  
जो यह पढ़ै हनुमान चलीसा । होय सिद्धि साखी गौरीसा ॥३९॥  
तुलसीदास सदा हरि चेरा । कीजै नाथ हृदय महँ डेरा ॥४०॥

॥ दोहा ॥

पवनतनय संकट हरन मंगल मूरति रुप । राम लखन सीता सहित हृदय बसहु सुर भूप ॥

सियावर रामचंद्रकी जय । पवनसुत हनुमानकी जय ॥

उमापाति महादेवकी जय । बोलो रे भाई सब संतनकी जय जय जय ॥

इति तुलसीदास विरचितम् श्रीहनुमान चलीसा संपूर्णम्  
सद्गुरु श्रीअनिरुद्धार्पणमस्तु ॥ शुभं भवतु । शुभं भवतु । शुभं भवतु ।